

**Mene ! Mene ! Tekele !  
Ufarsin !!**

*U. Daniel 5, 25.*

(Yimbongikazi Nontsizi Mgqwetto.)

Ngumbhalo lowo makowetu ! Ezi-ndongeni Zezwe : Ubhalwe ngesi Hebere : Inguqulo yawo iti—u Tixo ububalile ubukumkani bako wabufeza : Ulinganisiwe, ke ngoko eskalini ; wafupyanwa ulula. Ubukumkani bako buhlutiwe, banikwa Izizwe ezingqonge Izwe lako ! Ngati wawusi tsho kum nawe ndikangele nje ; Tata i versi yesine kwakweso Sahluko : Iti—sasela i wayini, sabancoma otixo base mzini ; begolide nesilivere nabo b'edu, nabesinyithi, nabemiti, nabamatyete : Akunjalo ke ? Ngawukangele ke nawe ubunewunewu belilizwe bentlobo zonke : Oleseshayo makaqige ! Ukuba lominwe, eyabhala apo Eludongeni, ayimelwena ukuba namhla nje ayingeze ibhalena ? Ezindongeni ze Afrika : Tata kwakona ! Iversi yamashumi amabini anantatu kwa kweso Sahluko—iti : Sazipakamisa ngapezu ko Tixo Wezulu : Sati namasiko esasivele nawo, sawabona namhlanje ukuba ngawamaqaba ; Sisenza u Tixo ke ngoko iqaba : Oyena kuse—Sandleni Sake ukupefumla kwetu : Onazo zonke kwanendlela zetu : Camagu !!

Mene ! Mene ! Tekele ! Ufarsin  
Awu ! Ndek'ubeka ndibheka emlu.  
[ngwini]

Ndeva sendibanjwa ngumakamandela  
Obomi bomhlaba umhendi omdala.

Latsho ! Ezindondgen' latsho kusakiwe  
Latsho bonwabile laveza iminwe  
Latsho u Kumkani wasi nkwalalala  
Lashiya maxego ambete izandla.

Kwaye kuyolile umzi ugongqile  
Wonke wonk' upela uvele ngonwele  
U Satani ebonga kutshone nenkaba  
Nini magqob'oka kwanati maqaba.

Sazipakamisa ngapezu ko Tixo  
Latsho Ezindongen' kweva namaxozo  
Kwimis' emidala yo Beletshatsare  
Yo tixo bobhedu nabe silivere.

Ulinganisiwe wabonwa ulula  
Latsho kabuhlungu Elomdal' Omdala  
Ubukosi bako ngoko buhlutiwe  
Banikwa Izizwe ngombhalo womnwe.

Kayek' ukubusa nawe utsho kuwe  
Uhlaba inkosi uhlaba ne Sizwe  
Emka amasiko aye silungwini  
Kuba sabancom' otixo base msini

Nibusa kubani ? Kuyiyo lemini  
Nango ke nombhalo umé Zindongeni  
Asinini aba ? Nidla ngokugxeka  
Xa sithi " buyani " nina be Afrika.

Mene ! Mene ! Tekele ! Ufarsin  
Upina umbuso wesema Xoseni  
Wezizwe Zintsundu ngapantsi kwe

[Langa.

Wonyana nentombi zetu siluhlanga.

Ulinganisiwe eskalini walula  
Nango ke Umbhalo namhla sukulala  
Sasela iwayin otixo base mzini  
Sahlukana sedwa say' ezinkonxeni.

Mene ! Mene ! Tekele ! Ufarsin  
Namhlanje Afrika puma ehlatin  
Ufunde lombhalo use Ludongeni  
Ukupe no tixo base buginweni.

Camagu ! !